



Tgirar la cultura da discuorer

Davart la curascha civila ha la presidenta dil Forum per la cultura dalla pasch Lea Suter discurreu cun l'antiura cussegliera federala Eveline Widmer-Schlumpf. Ellas han fatg quei il margis vargau duront ina spassegiada tras il marcau da Glion.

ANDREAS CADONAU/FMR

«Per sequietar gida ina scadiola te da camélla.» In cussegl che *Eveline Widmer-Schlumpf* ha retschert l'entschatta dils onns 80 dad ina sora dominicana dalla claustra da Glion. Tra diu quei misteri ha l'antiura cussegliera federala a caschun dad ina spassegiada tras Glion. Ina spassegiada organisada dil Forum per la cultura dalla pasch igl gliendisgis vargau a caschun dallas activitads actualas el rom dalla «Stad da Glion». Basegns per ina scadiola te da camélla ha Eveline Widmer-Schlumpf giu probabel pliras gadas el decuors dalla veta. Forsa ha ella duvrau pliras scadiolas duront e suenter sia elecziun el Cussegl federal ils 12 da december 2007. L'entira historia da quella elecziun ei buca stada il tema principal duront la spassegiada tgamunada da Lea Suter. La gestiunaria dalla Societad Svizra-Naziuns unidas e tgamun dil Forum per la cultura da pasch ha discurreu cun l'antiura cussegliera federala grischuna davart la curascha civila ella politica.

Mussar curascha

La spassegiada ei vegnida accumpignada dad in tschuat persunas ed ellas han saviu tedlar ils discuors dallas duas protagonistas via emettur. Per curaschusa

ha Eveline Widmer-Schlumpf buca exnum valetau sia decisiun da surpender igl uffeci sco cussegliera federala avon varga diesch onns. «Jeu sun denton buca naiva e vai saviu tgei che spetgi sin mei.» L'antiura magistrata ha fatg attent alla decisiun dil parlament che hagi elegiu ella el Cussegl federal. «Visavi a quella voluntad dil parlament ei mia decisiun stada ina decisiun digl intellect.» Ina decisiun segir era influenzada da sia professiun sco giurista. «Era sche l'intuiziun havess forsa getg na.» Eveline Widmer Schlumpf ei dil meini che las instituziuns statalas meretien in cert respect. «Ei sa buca esser che quellas instituziuns vegnan continuadamein svaletadas.» Per exempel ha l'antiura cussegliera federala menziunau las dertgiras. «Secapescha che jeu sun magari era buca stada cuntenta cun ina decisiun dad ina dertgira, semplamein per quei che jeu hai - sco advocata - piars avon quella dertgira.»

Acceptar decisiuns

Eveline Widmer-Schlumpf resenta che la promptadad dad acceptar decisiuns dalla maioritad sesminuescha, e quei ton el parlament sco era decisiuns dil pievel. «Pilpli sebasan quellas decisiuns sin in consens ed ein impurtontas per la

societad.» Tschercar il consens ei stau ina impurtonta part dalla lavur politica en tut ils gremis politics che la magistrata grischuna ha occupau duront sia activitad politica. Ella ha rischau dad in exponent politic che hagi attaccau en diversas gasettas dalla dumengia ina part da sia lavur sco cussegliera federala. «Il gliendisgis vai jeu envidau el ad in caffè en Casa federala, el ei vegnius, denton buca exnum bugen.» Eveline Widmer-Schlumpf ha confruntau el cun las renfatschas. «Jeu vai getg ad el ch'el sappi exact che sias pretensiuns constetien buca.» Igl hosp da caffè ha bein concediu quei fatg, ha denton fatg valer che la verdad secordeschi buca cun l'atgna strategia.

Emprender da vegnir a frida

La cultura da discussiunar ei per l'antiura cussegliera federala in impurtont instrument, buca sulet ella politica. «Da vegnir a frida cun conflicts ston ins emprender ella veta privata, en uniuns ed insumma el mintgagi.» Ed per turnar tiel te da camélla cussegliaus avon varga 40 onns dalla sora dominicana ad Eveline Widmer-Schlumpf: Ella era talmei gnervusa da seppresentar avon ina classa da scolars dalla scola claustrala. Per quater jamnas haveva ella surpruiu da dar istruzion civica.



Han fatg ina tura tras Glion e discurretti da cultura e curascha ella politica ed el mintgagi. La menadra dil Forum per la cultura da pasch Lea Suter (seniester) e l'antieriura cussegliera federala Eveline Widmer-Schlumpf (dretg).

FOTO ANDREAS CADONAU